

Menggempur kemiskinan menerusi pendidikan

Oleh IZHAM YUSOFF

SASARAN untuk membasmi kemiskinan tegar di negara ini menjelang penghujung Rancangan Malaysia Kesembilan (RMK-9), sekali gus mengurangkan separuh kemiskinan keseluruhan kepada 2.8 peratus, harus menjadi tanggungjawab semua.

Apa yang digariskan kerajaan dalam RMK-9 merangkumi beberapa langkah drastik bagi menangani kemiskinan di luar bandar dan bandar. Ini termasuklah memantapkan pelaksanaan program bagi kumpulan sasaran dengan tumpuan diberikan kepada negeri yang mencatat bilangan isi rumah miskin dan miskin tegar yang tinggi.

Membasmi kemiskinan, pengagihan pendapatan, pemilikan kekayaan dan penyusunan semua guna tenaga dalam RMK-9 berpaksikan pengurangan jurang pendapatan, mewujudkan penyertaan yang lebih seimbang dan adil antara etnik dan wilayah.

Sejumlah RM4.46 bilion diperuntukkan bagi membasmi kemiskinan dan RM7.06 bilion bagi penyusunan semula masyarakat. Bajet 2007 juga menyaksikan peruntukan besar sebanyak RM33.4 bilion atau 21 peratus daripada jumlah bajet sebanyak RM159.4 bilion untuk belanja mengurus dan pembangunan modal insan.

Ia dilihat sebagai prasyarat penting ke arah memacu pertumbuhan rantaian ekonomi bernilai tinggi berpaksikan pengetahuan dan teknologi. Ia juga penting bagi menjayakan matlamat untuk membasmi kemiskinan tegar sepenuhnya menjelang 2010.

Pelbagai insentif yang ditawarkan kerajaan menerusi Bajet 2007 hendaklah dilihat sebagai titik perubahan sosial masyarakat melalui motivasi, keazaman dan tindakan berani lagi drastik bagi menjayakan Misi Nasional khususnya ke arah melahirkan modal insan kelas pertama. Ia juga titik tolak penting ke arah menaikkan taraf sosioekonomi rakyat, seterusnya menghapuskan terus kemiskinan tegar.

Pembangunan

Kemiskinan perlu dilihat dari dua perspektif utama. Pertama, kemiskinan harta benda yang menjadi faktor penting untuk terbabit sama dalam arus pembangunan dan perubahan. Kedua, kemiskinan jiwa, sikap, pemikiran dan kemahuan yang banyak menghalang orang Melayu atau Islam maju.

Hakikatnya soal kemiskinan adalah satu konsep yang sukar ditafsir. Ia bersifat subjektif dan memerlukan pertimbangan nilai yang mendalam. Kemiskinan secara umumnya ditakrifkan sebagai ketidakupayaan untuk memenuhi keperluan-keperluan asas yang minimum untuk hidup seperti keperluan makanan, perumahan, pakaian, pelajaran, kesihatan, kebajikan dan kemudahan sosial yang lain.

Persoalan kemiskinan bukan menyentuh takdir semata-mata, tetapi juga berkait dengan ikhtiar manusia. Bagaimana ikhtiar kerajaan yang memerintah untuk mengatasi masalah kemiskinan. Apakah usaha individu untuk membanteras kemiski-

nan yang membelenggu dirinya? Sejuah mana kita sanggup dan berani menyahut cabaran kerajaan yang memperuntukkan bajet begitu besar khususnya dalam sektor pendidikan dan modal insan?

Bila memperkatakan soal kemiskinan, kita tidak dapat memisahkannya daripada bumiputera yang jurang pendapatannya masih jauh berbanding kaum lain.

Harus diingat, keadaan ketidakseimbangan ini, jika tidak ditangani, ibarat duri dalam daging, menjadi punca yang boleh menggugat perpaduan kaum dan kestabilan negara, seterusnya menggugat pembangunan ekonomi negara. Di sini sekali lagi ilmu, memiliki kemahiran dan modal insan kelas pertama memainkan peranan penting.

Justeru pendekatan kerajaan untuk melaksanakan program membina dan meningkatkan keupayaan golongan miskin dengan memberikan pendidikan, latihan kemahiran dan pengetahuan supaya berupaya melakukan aktiviti ekonomi lebih produktif, wajar dipuji.

Pendayung sudah di tangan dan ikatan perahu sudah dilepaskan. Apa yang dituntut sekarang ialah kesungguhan, kegigihan, keberanian dan semangat juang yang tinggi khususnya di kalangan golongan sasaran serta seluruh lapisan masyarakat, untuk sama-sama menjayakan matlamat membasmi kemiskinan di negara ini.

Pembasmian kemiskinan wajib dijadikan sasaran utama dalam usaha besar menangani ketidakseimbangan pencapaian sosioekonomi negara demi memastikan nasib warga terbelah, landasan sosioekonomi negara kukuh, perpaduan dan

kestabilan negara dikekalkan dan ekonomi negara terus dibangunkan.

Program pembasmian kemiskinan harus lebih efektif bukan hanya menawarkan bantuan semata-mata. Ia hanya melahirkan sekumpulan masyarakat yang terus bergantung subsidi dan tidak berjaya membantu mereka meningkatkan pendapatan.

Pada masa sama pengaruh politik juga harus digerakkan secara agresif untuk membasmi kemiskinan sehingga akar umbi. Rakyat akan mengeluh jika wakil rakyat mereka sentiasa sibuk dan tidak mempunyai masa untuk mendengar rintihan kecil rakyat. Program membawa keluar golongan sasaran daripada terus terperangkap dalam belenggu kemiskinan haruslah dilakukan secara menyeluruh, bukan berat sebelah dan tidak memilih fahaman ideologi politik.

Sasaran membasmi kemiskinan tegar pada 2010 agak mencabar serta memerlukan usaha gigih kerajaan dan penerima. Ia satu jihad dan akan hanya terhapus jika program mantap dan berkesan yang digariskan pucuk kepimpinan negara dilaksanakan secara bersungguh-sungguh, digerakkan dengan sepenuh hati.

Gerak gempur kemiskinan perlu bersepadu di pihak kerajaan, penerima dan seluruh khalayak masyarakat, untuk memastikan komitmen dan kesungguhan misi RMK-9 menjadi satu kenyataan.

➤ PENULIS ialah Ketua Pegawai Eksekutif KUB Malaysia Berhad.